

JA' TI SBA SCARTA TI LAJ STS'IBA TI JUANE, JA' TI JCHOLC'OPE

**Ja' sc'opilal ti sventainoj scotol
ti cuxlejale ti Jesucristoe**

1 Ja' ti stalel oye laj ca'ibetutic ti sc'ope ti ho'ontutique. Laj quiltutic ti jsatutic. Ep vuelta laj quilbetutic ti sate. Laj jpictutic ti jc'obtutic. Ja' ti Jesucristoe ti tal yalbucutic c'u x'elán yo'nton ti Jtotic Diöse. Ja' sventainoj scotol ti cuxlejale ti Jesucristoe. ²Laj yac' sba ti q'uelel ti ja' j'ac'cuxlejale. Laj quiltutic. Hech yu'un chajcholboxuc ava'yic c'u x'elán ti j'ac'cuxlejale sbatel osile, ja' ti te ono'ox xchi'inoj ti Jtotic Diöse. Patil tal yac' sba ti q'uelel ti jtojoltutic. ³Yu'un laj xa quiltutic ti ho'ontutique, yu'un laj xa ca'ibetutic ti sc'ope, hech yu'un chajcholboxuc ava'yic uc yu'un hech jun chije'otucutic ti stojol ti Diöse. Yu'un ti ho'ontutique jun nic'otutic xa ti mero melel xchi'uc ti Jtotic Diöse xchi'uc ti Snich'one, ja' ti Jesucristoe. ⁴Hech yu'un ti hech chajts'ibaboxuc avi to ho'oni yu'un hech más nichim no'ox co'ntontic jcotoltic.

**Ja' sc'opilal ti toj yo'nton ti Diöse,
mi jutuc mu'yuc mulil ti yo'nton**

⁵Chacalbeic ti sc'op ti Jesucristoe ti c'u che'el laj yalbuntutique. Hech

laj yalbuntutic: “Ti bu oy ti luze chquevan, mu'yuc ic' osil te o. Ja' no'ox hech ti Diöse toj yo'nton stuc, mi jutuc mu'yuc mulil ti yo'nton”, xchi. ⁶Jun c'otemun xchi'uc ti Diöse, mi chijchie, mi cac'oj jbatit ti jsa'ilan jmultic ti jnoptic c'op obi. Yac'o caltic ti jch'unojtique. ⁷Mi jcotoltic ti jpsilantic ti c'u che'el chijyalbucutic ti Diöse hech yu'un jun chije'otucutic ti ho'ucutique yu'un jun nije'otucutic xa xchi'uc ti Diöse. Mi oy jmul laj jtatique, ti Diöse chispocbucutic c'uc no'ox ti sbolil ti co'ntontique yu'un laj yac' ti milel yu'un jmultic ti Snich'one. ⁸Muc bu ti jta jmul, mu'yuc c'usi chopol ti jpas, mi chijchie, ti jlo'la jbatit obi. Hovil ti hech chalcaltique. ⁹Ti c'alal ti jta ti jmultique, mi jamal chcalbetic ti Diöse, ja' chixch'aybucutic. Chispocbucutic c'uc no'ox ti sbolil ti co'ntontique. Yu'un laj yac' ti milel yu'un jmultic ti Snich'one hech xu' chiscoltaucutic ti Diöse. Hech chc'ot ti pasel ti hech ono'ox yalobjbucutic ti Diöse ti chixch'aybucutic ti jmultique. ¹⁰Mu'yuc bu jtaoj jmul o, mi chijchie, yu'un ti jcuytic ti ja' tsnop c'op ti Diöse obi. Mu'yuc ti

co'ntontic ti sc'op ti Diose obi yu'un yaloj ti Diose ti jmulavilucutique.

Ja' sc'opilal ti chc'opoj cu'untic ti stojol ti Diose ti Jesucristoe

2 Col jnich'nab, ho'oxuc ti ach'unobjeic sc'op ti Cajvaltique, yu'un ti hech laj jts'ibaboboxuque yu'un hech mu xa me xasa' amulic. Mi oy ataojic amulic, na'ic me ti ja' chc'opoj cu'untic ti stojol ti Jtotic Diose ti Jesucristoe, ja' ti toj yo'nton stuque. ²Ja' jq'uexoltic laj stojbucutic jmultic c'alal icham ti cruz. Mu jtucticuc no'ox jmultic laj stojbucutic. Ja' laj stojbe smul scotol crixchanoetic uc. ³Yu'un ti jc'an ti jch'umbetic smantal ti Diose, hech ti jna'tic ti yol snich'onucutique. ⁴Ho'on yol snich'onun ti Diose, mi chijchie, mi mu jc'an jch'umbetic smantale, ja' ti jnoptic c'op. Hovil ti hech chcaltique. ⁵Yu'un mi ti jch'umbetic ti sc'ope, c'ux chca'itic ti Diose ti mero melel. Hech ti jna'tic ti oyucutic ti stojole. ⁶Oyun ti stojol ti Diose, mi chijchie, hech ac'o jpastic hech chaj c'u che'el laj spas ti Jesucristoe.

Ja' sc'opilal ti tsots sc'opilal ti chijc'uxubinvan

⁷Ho'oxuc ti c'uxoxuc ti co'ntone, ma'uc ach' mantal chajts'ibaboboxuc. Ja' no'ox chajcha't'abesboxuc ti avo'ntonic ti mantal ti vo'one xa ava'yojique c'alal lic ach'umbeic sc'op ti Cajvaltique. Ja' ti c'ux chava'i abaique. ⁸Jun to ach' mantal yu'un tsots sc'opilal, hech yu'un chajcha't'abesboxuc ti

avo'ntonic yan vuelta. Yu'un mi chijc'uxubinvan, chcom cu'untic ti c'usi chopole. Ja' ti jts'aclitic ti Jesucristoe hech chaj c'u che'el ic'uxubinvane. ⁹Cac'oj jba ti jpas c'usi tsc'an ti Diose mi chijchie, mi chquilintatic yan, ja' mu to chcom cu'untic ti c'usi chopole. ¹⁰Mi chijc'uxubinvane ja' cac'oj jba ti jpastic ti c'usi tsc'an ti Cajvaltique. Hech mu'yuc xa ti co'ntontic ti c'usi chisbolibtasucutique. ¹¹Mi chquilintatic yan, ja' mu to chcom cu'untic ti c'usi chopole. Cac'oj jbatic ti jpastic ti c'usi chopole. Mu jna'tic bu chijyic'ucutic batel yu'un mu xc'ot jsatic scoj ti mulile.

¹²Col jnich'nab, ho'oxuc ti ach'unobjeic sc'op ti Cajvaltique, yu'un ch'ayem xa ti amulique ti sventa ti Jesucristoe, hech yu'un chajc'oponoxuc ti carta acotolic. ¹³Chajc'oponoxuc, ho'oxuc ti mol me'eloxuc xae, yu'un laj xa avojtiquinic ti Cristoe ti stalel oye. Chajc'oponoxuc uc, ho'oxuc ti unen vinicoxuc unen antsoxuc toe, yu'un scotol ora stsal avu'unic ti pucuje. Col jnich'nab, yu'un laj xa avojtiquinic ti Jtotic Diose hech yu'un laj xa jts'ibaboboxuc avi to. ¹⁴Ho'oxuc ti mol me'eloxuc xae, yu'un laj xa avojtiquinic ti Cristoe ti stalel oye, hech yu'un laj xa jts'ibaboboxuc avi to. Ho'oxuc ti unen vinicoxuc unen antsoxuc toe, yu'un oy xa yip avo'ntonic hech yu'un laj xa jts'ibaboboxuc avi to. Oy ti avo'ntonic ti sc'op ti Diose hech yu'un scotol ora stsal avu'unic ti pucuje.

¹⁵Mu me ja'uc chbat avo'ntonic ti c'utic sventa no'ox ti balumile

xchi'uc ti c'utic oy li' ti balumile. Yu'un mi te batem co'ntontic ti c'utic sventa ti balumile, mu c'uxuc chca'itic ti Jtotic Diose. ¹⁶Ti crixchanoetique ti li'oyic ti balumile ja' batem ti yo'ntonic ti c'utic tsc'an ti sbec'talique xchi'uc ti c'utic lec chilic ti satique, xchi'uc ti c'utic tstoy sbaic yu'une. Ja' mu sc'an ti Jtotic Diose mi hech to ti jpastic uc hech chaj c'u che'el ti tspace ti crixchanoetique. ¹⁷Yu'un ti c'utic tspace ti crixchanoetique j'ech'el chlaj sc'opilal. Hech yu'un hovil ti ch-ic'van ti ora to. Mi ja' ti jpastic ti c'utic tsc'an yo'nton ti Diose, ja' chijcuxi sbatel osil.

Ja' sc'opilal ti yajcontra ti Cristoe

¹⁸Col jnich'nab, ja' slajebal c'ac'al ti ora to. Ca'yojbetic sc'opilal ti chtal ti yajcontra ti Cristoe c'alal tsta yorail slajebal c'ac'al. Ti ora to ep xa liquemic tal ti yajcontra ti Cristoe. Hech yu'un ti jna'tic ti ja' slajebal c'ac'al ti ora to. ¹⁹Ti much'utic yajcontra ti Cristoe ti ora to, ja' ti laj jchi'intique. Ti ora to loq'uemic xa batel yu'un mu jtosuc co'ntontic xchi'uc. Ti jtosuc co'ntontic xchi'uque, jchi'inojtic to ti hechuque. Yu'un iloq'uc xa batel, hech chvinaj ti mu jcotolticuc jtos ti co'ntontique. ²⁰Ti ho'oxuque yu'un na'ac'bat avich'ic uc ti Ch'ul Espiritue ti laj stacbucutic tal ti Jesucristoe hech yu'un acotolic chana'ic xa uc ti c'ope ti ja' melele. ²¹Mu yu'unuc mu xana'ic ti c'ope ti melele. Ja' yu'un chana'ic hech yu'un chajts'ibaboxuc. Chana'ic ti mi mu xco'olaj xchi'uc ti c'op ti ja' melele, ja' tsnopic c'op obi. ²²Mu

ac'biluc yabtel yu'un ti Diose ti Jesucristoe, mi xchiique, ja' tsnopic c'op obi. Ti Jesucristoe ma'uc stot ti Diose, mi xchiique, yu'un tsontrainic ti Cristoe. ²³Ma'uc Snich'on Dios ti Jesucristoe, mi xchiique, yu'un mu xch'unobjuc sc'op ti Jesucristoe. Mu xch'unobjuc sc'op uc ti Diose. Ja' Snich'on Dios ti Jesucristoe, mi xchiique, ja' xch'unobjeic sc'op ti Jesucristoe. Xch'unobjeic sc'op uc ti Diose. ²⁴Hech yu'un ti c'u yepal laj ava'yic ti sliqeb c'alal lic ach'umbeic sc'op ti Cajvaltique, j'ech'el ac'o ti avo'ntonic. Yu'un mi j'ech'el c'otem ti avo'ntonic ti c'u yepal laj ava'yique c'alal lic ach'umbeic sc'op ti Cajvaltique, hech j'ech'el na'ochic xa ti stojol ti Snich'on ti Diose xchi'uc uc ti stojol ti Stote. ²⁵Yu'un laj yalbucutic comel ti Jesucristoe ti chijyac'bucutic jcxulejaltic sbatel osile.

²⁶Hech yu'un laj xa calboxuc sc'opilal ti much'utic sc'an chaslo'laouxuque. ²⁷Ti Jesucristoe laj yac'bucutic quich'tic ti Ch'ul Espiritue. J'ech'el te oy ti co'ntontic. Hech yu'un mu persauc oy yan jchanubtasvanej cu'untic yu'un ja' chixchanubtasucutic scotol. Melel ti sc'ope, mu jnope'opuc. Hech chaj c'u che'el laj xa xchanubtasoxuc ti Ch'ul Espiritue hech teanic ti stojol ti Jesucristoe.

²⁸Col jnich'nab, j'ech'el teanic ti stojol ti Jesucristoe yu'un hech oy me stsatsal co'ntontic c'alal chtale. Yu'un hech mu xijq'uexavucutic ti stojol c'alal chtale. ²⁹Yu'un ti jna'tic ti ja' toj yo'ntone, hech ti jna'tic uc ti yol snich'onucutic ti ho'ucutique mi toj scotol ti c'utic ti jpastique.

**Ja' sc'opilal ti yol snich'on
Dios c'otemucutic xa**

3 Ava'i c'u x'elan c'uxucutic ti yo'nton ti Jtotic Diose ti col jnich'naboxuc, xijyutucutique. Melel ti yol snich'onucutique. Hech yu'un mu xijyojtiquinucutic ti crixchanoetique yu'un mu xojtiquinic ti Jtotic Diose. ²Ho'oxuc ti c'uxoxuc ti co'ntone, yol snich'on Dios c'otemucutic xa. Mu to ti jna'tic c'u x'elan chijc'otucutic. Ja' no'ox ti jna'tic ti co'ol chijc'otucutic xchi'uc ti Cristoe c'alal chtale yu'un ti jq'ueltic c'u x'elan. ³Mi ti jmalatic chtal ti Cristoe, chcaqu'uilan jbatc ti lecubtasel. Hech lec co'nton chijc'ot hech chaj c'u che'el lec yo'nton ti Cristoe.

⁴Mi ti jsa' jmultique, ja' ti jtoy jbatc ti stojol ti Diose, ti jp'ajbetic smantal. ⁵Chana'ic ti yu'un tal xcuchbucutic jmultic hech yu'un ital ti Cristoe. Ti stuque mu'yuc mulil ti yo'nton. ⁶Mi oyucutic ti stojol ti Cristoe, mu xa jsa' jmultic. Mi ta to jsa' jmultic, mu to chcojtiquintic ti Cristoe, mu to ti jna'tic hech chaj c'u che'el tsc'an ti yo'ntone. ⁷Col jnich'nab, mu me much'u chaslo'laoxuc. Mi lec ti c'utic ti jpastique, yu'un toj co'ntontic obi hech chaj c'u che'el toj yo'nton ti Cristoe. ⁸Mi ti jsa' jmultic, oyucutic to ti sc'ob ti pucuje. Yu'un ti pucuje ja' laj sliques ti mulile. Hech yu'un stalel puru mulil oy ti yo'nton asta ti ora to. Ja' yu'un ti ital ti Snich'on ti Diose yu'un tal sjimbe yabtel ti pucuje. ⁹Mi cha'anemucutic xa ti stojol ti Diose, mu xa jc'an

jsa' jmultic. Yu'un te oy Dios ti co'ntontic, hech yu'un ti mu xa jc'an jsa' jmultique. ¹⁰Hech chvinaj mi yol snich'onucutic ti Diose, mi yol snich'onucutic ti pucuje. Yu'un mi mu xtun ti c'utic ti jpastique, mi mu c'uxuc chca'itic scotol yantic, ma'uc yol snich'onucutic ti Diose obi.

¹¹Hech chal ti sc'op ti Diose ti laj ava'yic c'alal lic ach'unique: C'ux me xava'i abaic, ti xchie. ¹²Hech yu'un mu me xapasic hech chaj c'u che'el laj spas ti Caine. Yu'un ti Caine oy ti sc'ob pucuj, hech yu'un laj smil ti yits'ine. Yu'un ja' toj ti c'utic laj spas ti yits'ine. ¹³Quermanotac, mu me xch'ay avo'ntonic c'alal mi chayilintaouxuc ti crixchanoetique. ¹⁴Yu'un c'ux chca'itic ti quermanotique, hech yu'un ti jna'tic ti comen xa cu'untic yu'un ti ch'ayel chijbatucutique. Oyucutic xa ti sventa ti chijcuxiucutic sbatel osile. Mi mu c'uxuc chca'itic ti quermanotique, yu'un oyucutic to ti sventa ch'ayel chijbat obi. ¹⁵Mi chquilintatic yan, ja' jmilvanejucutic xa c'otemucutic obi. Chana'ic ti much'u jmilvaneje mu yich'ojuc xcuxlejal sventa sbatel osil. ¹⁶Hech ti jna'tic ti c'uxucutic ti yo'nton ti Jesucristoe yu'un laj yac' sba ti milel ti jventatic. Hechuc me ac'o jpastic hech chaj c'u che'el laj spas ti Cristoe ac'o jcoltatic yantic manchuc mi te chijlaj ti milel yu'un. ¹⁷Mi oy c'utic oy cu'untic li' ti balumile, mi chquiltic ti much'utic uts sbaique, mi mu jc'uxubintic mi jutuc, hovil chcaltic ti c'ux ti co'ntontic ti Diose. ¹⁸Col jnich'nab, mu me hoviluc chcaltic

ti chijc'uxubinwane, mu me jnoptic c'op. Ac'o vinajuc ti cabeltique ti chijc'uxubinvan ti mero mehel.

¹⁹Yu'un mi chijc'uxubinwane hech ti jna'tic ti jch'unojtic ti mero mehel. Hech yu'un jun co'ntontic ti stojol ti Diose. ²⁰Mi mu junuc co'ntontic ti stojol ti Diose, ac'o jna'tic ti mehel ti sc'op ti Diose. Ac'o jna'tic uc ti mu scotoluc mehel ti c'usi ti jnop ti co'ntontique. Yu'un ti Diose yalojbutic ti yol snich'onucutic nijc'ot o. ²¹Ho'oxuc ti c'uxoxuc ti co'ntone, mi jun co'ntontic ti stojol ti Diose, hech mu jxi'tic yu'un ti jc'opontic. ²²Yu'un ti jch'umbetic ti smantale, yu'un ti jpastic ti c'usi sc'an ti yo'ntone, hech yu'un chijyac'butic scotol ti c'utic ti jc'ambetique. ²³Hech smantal ti Diose ti ac'o jch'umbetic ti sc'op ti Snich'one, ja' ti Jesucristoe. Hech smantal uc ti c'ux ac'o ca'i jbatique. ²⁴Yu'un mi ti jch'umbetic ti smantale, oyucutic ti stojol obi. Oy ti co'ntontic ti Diose. Ti jna'tic ti oy ti co'ntontic ti Diose ti sventa ti Ch'ul Espiritue ti yac'ojbuticque.

**Ja' sc'opilal ti much'utic
yich'ojic ti Ch'ul Espiritu yu'un
ti Diose xchi'uc ti much'utic mu
yich'ojuc ti Ch'ul Espiritue**

4 Ho'oxuc ti c'uxoxuc ti co'ntone, mu me xach'unic c'uc no'ox c'op chava'yic. P'ijanic me, a'yic me mi chco'olaj xchi'uc ti sc'op ti Diose. Yu'un ep ti much'utic li' ti balumile chalic sc'op Dios ti scuyojuque. ²Hech chvinaj ti yich'oj ti Ch'ul Espiritue ti laj stac talel ti Diose. Mi jamal chal ti a'yich' sbec'tal li' ti balumile ti

Jesucristoe, mi xchie, ja' yich'oj ti Ch'ul Espiritue ti laj stac talel ti Diose. ³Muc xtal yich' sbec'tal li' ti balumile ti Jesucristoe, mi xchie, ja' mu yich'ojuc ti Ch'ul Espiritue ti laj stac talel ti Diose. Ja' jtos yo'ntonic xchi'uc ti yajcontra Cristo obi. Ja' avayojbeic sc'opilal ti chtale obi. Oy xa li' ti balumile. ⁴Col jnich'nab, ho'ucutic yol snich'onucutic ti Diose, hech yu'un tsalbil xa cu'untic ti much'utic chalic sc'op Dios ti scuyojuque. Yu'un más jelaven sp'ijil ti Diose ti li'oy ti co'ntontique. Ja' mu'yuc sp'ijil ti pucuje ti te oy ti yo'ntonique. ⁵Ti much'utic chalic sc'op Dios ti scuyojuque, ja' sp'ijil no'ox crixchanoetic. Ja' no'ox hech chaj c'u che'el sp'ijil crixchanoetic ti smantalique. Hech yu'un tspasbat ti muc' ti sc'opique yu'un ti crixchanoetique. ⁶Ti ho'ucuticque yol snich'onucutic ti Diose. Hech yu'un ti much'utic yol snich'on uc ti Diose, ja' chispasbutic ti muc' jc'optic. Ti much'utic mu yol snich'onuc ti Diose mu xispasbutic ti muc' jc'optic. Hech chcojtiquntic ti much'utic chalic ti sc'op Diose ti mero mehel. Hech chcojtiquntic uc ti much'utic chlo'lavanique.

**Ja' sc'opilal ti ja' stalel
che'uxubinvan ti Diose**

⁷Ho'oxuc ti c'uxoxuc ti co'ntone, c'ux ac'o ca'i jbatic yu'un ja' ti sventa ti Diose ti hech chijc'uxubinwane. Mi chijc'uxubinwane yu'un cha'anemucutic xa ti stojol ti Diose obi. Ja' chcojtiquntic ti Diose. ⁸Mi mu xijc'uxubinwane yu'un

mu xcojtiquintic ti Diose. Yu'un ti Diose ja' stalel chc'uxubinvan. ⁹Ti Diose laj stac tael li' ti balumile ti Snich'one. Jun no'ox Snich'on oy ti Diose. Laj stac tael yu'un hech chijcuxiucutic yu'un. Hech laj yac'bucutic jna'tic ti Diose ti c'uxucutic ti yo'ntone. ¹⁰Ava'i c'u x'elan c'uxucutic ti yo'nton ti Diose. Mu yu'unuc ho'ucutic jbael c'ux laj ca'itic ti Diose, ja' jbael c'ux laj ya'iucutic. Hech yu'un laj stac tael ti Snich'one. Ja' jq'uexoltic yu'un laj stojbucutic jmultic ti cruz. ¹¹Ho'oxuc ti c'uxoxuc ti co'ntone, yu'un hech c'uxucutic ti yo'nton ti Diose, hech yu'un c'ux ac'o ca'i jbatuc uc. ¹²Manchuc mi mu quilobjeticuc sat ti Diose, mi c'ux chca'i jbatuc, te oy ti co'ntontic. Hech c'ux chca'itic ti Diose ti mero mehel.

¹³Ti sventa ti Ch'ul Espiritu ti yac'objucutic ti Diose hech ti jna'tic ti oyucutic ti stojol ti Diose. Ti jna'tic uc ti oy ti co'ntontic ti Diose. ¹⁴Ho'ontutic laj quiltutic, ho'on rexticountutic ti laj stac tael ti Snich'one ti Jtotic Diose. Ja' tal scolta scotol crixchanoetic. ¹⁵Mi jamal chca'itic ti ja' Snich'on Dios ti Jesuse, oy ti co'ntontic ti Diose obi. Hech yu'un oyucutic ti stojol ti Diose. ¹⁶Hech yu'un ti jna'tic ti c'uxucutic ti yo'nton ti Diose. Ti Diose ja' stalel chc'uxubinvan. Hech yu'un mi chijc'uxubinvan, oyucutic ti stojol ti Diose obi. Hech yu'un ti Diose oy ti co'ntontic. ¹⁷Yu'un mi chijc'uxubinvan ti mero mehel hech muc chijxi' ti stojol ti Diose c'alal tsta yorail ti chich'be sc'op yu'un smulic

scotol crixchanoetic. Yu'un hech co'ntontic c'alal li'oyucutic ti balumile hech chaj c'u che'el ti yo'ntone. ¹⁸Mi ti jch'untic ti c'uxucutic ti yo'nton ti Diose, hech yu'un mu xijxi'. Yu'un ti chijxi'e, yu'un ti jnoptic mi chijyac'bucutic castigo ti Diose. Mi ti jch'untic ti c'uxucutic ti yo'nton ti Diose ti mero mehel, mu hechuc ti jnoptic. Hech yu'un mi oy x'i'el ti co'ntontique yu'un mu jch'unojticuc ti c'uxucutic ti yo'nton ti Diose. ¹⁹Ja' jbael laj xc'uxubinucutic ti Diose, hech yu'un c'ux chca'itic ti Diose ti ora to. ²⁰C'ux chca'i ti Diose, mi chijchie, mi chquilintatic yantic, ti jnoptic c'op obi. Yu'un mi mu jc'uxubintic ti much'utic ti li' ti jq'uelilambetic sate, ibu c'amba c'uxuc chca'itic ti Diose ti mu'yuc bu jq'uelobjetic sate! ²¹Hech smantal ti laj yalbucutic comele: "Mi c'ux chava'yic ti Diose, c'ux me xava'yic uc scotol ti much'utic co'ol li'oyoxuc ti balumil xchi'uque", xijyutucutic.

**Ja' sc'opilal ti ja' ti sventa
xch'unojel co'ntontic tsts'al
cu'untic c'utic oy li' ti balumile**

5 Mi jch'unojtic ti ja' t'ujbil yu'un ti Diose ti Jesucristoe ti ja' Jcoltavanej cu'untique, hech cha'anemucutic xa ti stojol ti Diose obi, hech yol snich'onucutic ti Diose. Li' ti balumile mi c'ux chca'itic jun jchi'iltic, hech c'ux chca'itic uc ti xnich'nabe. ²Ja' no'ox hech uc mi c'ux chca'itic ti Diose, hech jch'unojbetic ti smantale, hech c'ux chca'itic ti much'utic co'ol yol snich'onucutic xchi'uque. ³Yu'un mi

c'ux chca'it'ic ti Diose, ti jch'umbetic smantal. Mu volocul chca'it'ic ti jch'umbetic ti smantale yu'un ti c'ux chca'it'ique. ⁴Ti ho'ucutique yu'un cha'anemucutic xa ti stojol ti Diose, hech yu'un tsalbil chc'ot cu'untic scotol ti c'utic oy li' ti balumile. Ti sventa xch'unojel co'ntontic t'isal cu'untic ti c'utic oy li' ti balumile. ⁵Ti ho'ucutique yu'un jch'unojtic ti ja' Snich'on ti Diose ti Jesuse, hech yu'un tsalbil chc'ot cu'untic scotol ti c'utic oy li' ti balumile.

Ja' sc'opilal ti chijyalbucutic sc'opilal ti Jesucristoe ti Ch'ul Espíritue

⁶Ja' ti Snich'on ti Diose, ja' ti Jesucristoe, ti tal yich' ho' li' ti balumle, ti tal smal xch'ich'el ti cruze. Ma'uc no'ox tal yich' ho', ja' tal smal xch'ich'el ti cruz uc. ⁷Oy oxib ti sventa vinajel ti chijyalbucutic sc'opilal ti Jesucristoe. Ti Jtotic Diose laj xa yal ti ja' Snich'on ti Jesucristoe. Ti Snich'on ti Diose laj xa yal sba stuc ti ja' Stot ti Diose. Ti Ch'ul Espíritue ja' itacat yal tal yu'un hech chijyalbucutic uc ti ja' Snich'on Dios ti Jesucristoe. ⁸Oy oxib li' ti balumile ti chvinaj ti ja' Snich'on Dios ti Jesucristoe. C'alal laj yich' ho' ti Jesuse, ivinaj ti ja' Snich'on Dios ti Jesuse. C'alal laj smal xch'ich'el ti cruz, ivinaj uc ti ja' Snich'on Dios ti Jesuse. Ja' no'ox hech chijyalbucutic uc ti Ch'ul Espíritue ti ja' Snich'on Dios ti Jesuse. ⁹Mi ti jch'umbetic ti sc'op ti crixchanoetique li' ti balumile, ja' más ech'em tsc'an ti jch'umbetic sc'op ti Diose. Hech yalobjucutic

ti Diose ti ja' Jcoltavanej cu'untic ti Snich'one. ¹⁰Mi jch'unojbetic sc'op ti Snich'on ti Diose, hech ti jna'tic ti melel ti c'u che'el yalobjucutic sc'opilal ti Snich'one ti Diose. Mi mu jch'umbetic sc'op ti Snich'on ti Diose, ja' tsnop c'op ti jcuytic ti Diose yu'un mu jch'untic ti c'u che'el yalobjucutic sc'opilal ti Snich'one ti Diose.

¹¹Hech yalobjucutic ti Diose ti yac'objucutic jcuxlejaltic sventa sbatel osil. Ti sventa ti Snich'one ti oy jcuxlejaltic sbatel osil. ¹²Mi oy ti co'ntontic ti Snich'on ti Diose, hech chijcuxiucutic sbatel osil. Mi mu'yuc ti co'ntontic ti Snich'on ti Diose, hech mu xijcuxiucutic sbatel osil.

Ja' sc'opilal ti c'u che'el ti jna'tic ti chijcuxiucutic sbatel osile

¹³Hech yu'un laj jts'ibaboxuc avi to, ho'oxuc ti ach'unobjeic uc ti sc'op ti Snich'on ti Diose, yu'un hech chana'ic ti chacuxiic sbatel osile. ¹⁴Yu'un jtos co'ntontic xchi'uc ti Diose, hech mu xixxi' c'alal ti jc'opontic. Ti jna'tic ti chistsacbucutic jc'optic. ¹⁵Mi ti jna'tic ti chistsacbucutic jc'optique, hech ti jna'tic uc ti chijyac'bucutic tal ti c'utic ti jc'ambetique. ¹⁶Mi oy quermanotic yac'oj sba tsa' smul chavilic, mi mu yu'unuc ja' stamoj o ti sbelal ch'ayeale, ja' chac'opombeic Dios ti stojol. Hech ta to x'ac'bat xcuxlejal sbatel osil. Mi yu'un stamoj o ti sbelal ch'ayeale, ma'uc chacalboxuc yu'un chac'opombeic Dios ti stojol. ¹⁷Scotol ti c'utic chopole, ja' mulil. Oy mulil ti mu yu'unuc jtamojtic o ti sbelal ch'ayeale.

¹⁸Ti ho'ucutique ti jna'tic ti yu'un cha'anemucutic xa ti stojol ti Diose hech mu xa jsa' jmultic. Yu'un chixchabiucutic ti Snich'on ti Diose hech mu xu' chijyilbajinucutic ti pucuje.

¹⁹Ti jna'tic ti oyucutic ti sc'ob ti Diose. Ti jna'tic uc ti oyic ti sc'ob ti pucuje scotol ti crixchanoetique.

²⁰Ti jna'tic uc ti i'ay xa li' ti balumile ti Snich'on ti Diose.

Yu'un laj xa yac'bucutic ti sp'ijil ti co'ntontique hech yu'un laj xa cojtiquintic ti mero Diose. Oyucutic ti stojol ti mero Diose yu'un oyucutic ti stojol ti Snich'one, ja' ti Jesucristoe. Ja' mero Dios stuc, mu'yuc yan. Ja' ti chijyac'bucutic jcuxlejaltic sbatel osile. ²¹Hech yu'un col jnich'nab, mu'yuc c'u stu cu'untic ti c'utic ti jnoptic ti ja' chcoltavan ti jcuytique.